

四庫全書

子部

欽定四庫全書

冊府元龜卷七百二十八

宋 王欽若等撰

幕府部

辟署第三

後魏莫含鴈門繁時人家世殖貨貲累巨萬劉琨為并州辟含從事含居近塞下嘗往來國中穆帝愛其才器善待之及為代王備置官屬求含於琨琨遣含入國含心不願琨喻之曰當今胡寇滔天泯滅諸夏百姓流離

死亡塗地主上幽執沉溺醜虜唯此一州介在羣胡之間以吾薄德能自存立者賴代王之力是以傾身竭寶長子遠賢覬滅殘賊報雪大恥卿為忠節亦是奮義之時何得苟惜共事之小誠以忘出身之大益入為代王腹心非但吾願亦一州所賴舍乃入代叅國官

郎博字幼和范陽涿鹿人好學有文才充長吏幹刺史裴延雋用為主簿

崔孝暉字敬業博陵安平人少寬雅早著長者之風彭

城王勰之臨定州辟為主簿釋褐冀州安東府外兵叅軍

崔孝芬字恭梓博學好文司徒彭城王勰拔為行叅軍後除著作郎尚書令高肇親寵權盛子植除青州刺史啓孝芬為司馬後除司徒記室叅軍司空屬

崔士和為西道行臺元脩義左丞行涇州事蕭寶寅之在關中高選寮佐以為督府長史

崔長謙清河人好學脩立少有令名刺史尉景取為開

府諮議叅軍事

崔勉字宣祖永安初除建節將軍尚書右中兵郎中後  
太尉豫章王蕭贇啓為諮議叅軍

辛纂為越騎校尉尚書令李崇北伐蠕蠕引為錄事叅  
軍臨淮王彧北征以纂隨崇有稱啓為長史及廣陽王  
淵北伐又引為長史

李瑾美容貌有才學清河王懌知賞之辟司徒叅軍

宋輔字處仁少慷慨有大操博覽羣書州辟別駕

李東字休賢郡辟功曹以父憂去職終身不食酒肉孝  
明初司空任城王澄嘉其操尚以為叅軍事

張普惠以學業為任城王澄所重澄為安西將軍雍州  
刺史啓普惠為府錄事叅軍

房士達起家濟州左將軍府倉曹叅軍時京兆王繼為  
大將軍出鎮聞其名徵補騎兵叅軍領帳內統軍房景  
遠事二兄至謹撫養兄孤恩訓甚篤益州刺史傅堅娘  
慕其名義啓為昭武府功曹叅軍

盧道將秘書監淵之子涉獵經史頗有文才諸父竝敬  
憚之彭城王勰任城王澄皆虛襟相待勰為中軍大將  
軍辟行叅軍遷司徒東閣祭酒

裴仲規少好經史頗有志節咸陽王禧為司州牧辟為  
主簿

裴瑗字珍寶河北郡人少孤貧而清苦自立太守司馬  
悅召為中正悅為將軍征義陽引為中兵叅軍瑗夙夜  
恭勤為悅所知

郭祚字季祐孫小為并州刺史以祚為主簿重祚文才兼任之以書記時人多之

李元忠少勵志操居喪以孝聞清河王懌為司空辟為士曹叅軍

崔道固字季堅父輯南徙青州為泰山太守道固賤出適母兄等輕侮之時宋孝武為徐兗二州刺史得辟他州民為從事輯乃資給道固令其南征既至彭城駿以為從事道固美形容善舉止便弓馬好武事駿稍嘉之

會青州刺史新除過彭城駿謂之曰崔道固人身如此  
豈可為寒士至老乎而世人以其偏庶便相陵侮可為  
歎息青州刺史至州辟為主簿轉治中後為義隆諸子  
叅軍

薛謹字法順辯之子也宋武帝擒姚泓辟相府行叅軍  
隨武帝渡江轉記室叅軍

寇讚字奉國少以清素知名符堅僕射韋華州里高達  
雖年時有異嘗以風味相待華為馮翊太守召為功曹

高允字伯恭渤海人郡召功曹神龜三年太武舅陽平王杜超行征南大將軍鎮鄴以允為從事中郎年四十餘矣

高燮字季和渤海人亦有文才嘗從容於家州辟主簿陰道方性和雅頗涉書傳為李神雋所知賞神雋為前將軍荊州刺史請道方為其府長流叅軍

姜儉字文簡起家徐州車騎府田曹叅軍轉太尉外兵叅軍蕭寶寅討關西引為開府屬寶寅為雍州仍請開

府從事帶長安令

甄楷字德方粗有文學頗習吏事除祕書郎免官任城王澄為司徒引為法曹叅軍稍遷尚書郎孝明末定州刺史廣陽王淵被徵還朝時楷丁憂在鄉臨發召楷兼長史委以州任

楊固字敬安太和中從大將軍劉昶征義陽板府法曹行叅軍還言之高祖年三十餘始辟大將軍府叅軍事署城局仍從昶鎮彭城神龜末清河王懌領太尉辟固

從事中郎懌被害汝南王悅為太尉辟固從事中郎不就正光二年京兆王繼為司徒高選官寮辟固從事中郎

李琰之曾遊河內北山便欲有隱遁意會彭城王勰辟為行臺叅軍苦相敦引

胡叟少聰慧好屬文孤標坎壈未有仕路遂入漢中宋梁秦三州刺史馮翊吉翰以叟才士頗相禮接授叟末佐不稱其懷未幾翰遷益州叟隨入蜀多為豪雋所尚

穆子琳出帝時為鎮東將軍以占奪民田免官爵久之  
阿至羅國主副越居為蠕蠕所敗其子去賓來奔齊獻  
武王奏去賓為安北將軍肆州刺史封高車王招慰夷  
虜表子琳為去賓長史復其前封

羊侃字士業年三十一襲父爵華陰伯釋褐太尉汝南  
王悅騎兵叅軍揚州刺史長孫稚請為錄事叅軍後奏  
為統軍又請為其府錄事叅軍帶長安令府州之務多  
所委決

王士良字君明少脩謹不妄交遊孝莊末爾朱仲遠啓  
為府叅軍事

叱羅協少寒微嘗為小吏以恭謹見知嘗州刺史楊均  
擢為從事

北齊司馬子如雲中人孝昌中北州淪陷子如攜家口  
南奔肆州為爾朱榮所禮遇假以中軍榮之向雒也以  
子如為司馬

龐蒼鷹太原人知高祖有霸王之量每私加敬割其宅

半以奉高祖繇此遂蒙親識高祖之牧晉州引為兼治  
中從事

李繪字敬文儀貌端偉神情朗俊齊王蕭寶寅引為主  
簿記室專管表檄待以賓友之禮

王紘字師羅大安人初從葛榮反爾朱榮遣使喻之然  
後始降以為府從事中郎

封子繪字仲藻渤海人爾朱兆之亂與父隆之舉義信  
都奉使詣高祖高祖至信都召署開府主簿仍典書記

中興元年轉大丞相主簿

張華原字蒲國代郡人少明敏有器度高祖開驃騎府引為法曹叅軍遷大丞相府屬仍侍左右從於信都深為高祖所親待

崔陵字長儒河東人釋褐太學博士坐事免歸鄉里高祖於信都起義陵歸焉高祖見之甚悅以為諮議叅軍崔瞻字彥通陵之子也年十五刺史高昂召署主簿清河公岳辟為開府西閭祭酒後除御史高祖入朝還晉

陽被勅與北海王暉陪從俱為諸子賓友仍為相府中  
兵叅軍轉主簿

祖鴻勳涿郡人魏永安初元羅為東道大使署封隆之  
邢邵李渾李象及鴻勳竝為子使

高德政字士貞北海蓆人父顯魏滄州刺史德政幼而  
敏慧有風神儀表文宣引為開府叅軍知管記事甚相  
親狎神武入擢為相府掾委以腹心

徐遠字彥遐廣寧人少習吏事郡辟功曹高祖以遠閑

習書計命為丞相騎兵叅軍深為高祖所知

崔昂性端直少華沉深志略堅實難傾動少好章句頗綜文詞文襄廣開幕府引為記室叅軍

張亮字伯德西河人初事爾朱兆拜平遠將軍兆敗自縊於樹亮伏屍而哭高祖嘉歎之授丞相府叅軍事漸見親待委以書記之任

元景安魏昭成五世孫也沉敏有幹局少工騎射善於事人釋褐爾朱榮大將軍府長流叅軍

張纂字徽纂代郡人初為爾朱兆都督長史為兆使於高祖遂被顧識高祖起義山東劉誕據相州拒守纂亦在其中高祖攻而拔之引叅丞相軍事

獨孤永業字世基中山人也有才幹便弓馬被簡擢補定州六州都督宿衛晉陽或稱其有識用文襄與語悅之超授中外府外兵叅軍

王峻字巒高零丘人明悟有幹略高祖以為相府墨曹叅軍坐事去官久之文宣為儀同開府引為城局叅軍

崔廓之陳郡陽夏人沉隱有識量以學業見稱自臨水  
令為瑯邪王儼大司馬西閣祭酒遷領軍功曹叅軍  
李元忠趙郡人魏清河王懌為司空辟為士曹叅軍遷  
太尉啓復為長流叅軍懌後為太傅被詔為營構明堂  
大都督又引為主簿

羊烈字信卿太山人魏孝昌中方弱冠州辟主簿又兼  
治中從事史以吏事為意幹濟見知擇中太師咸陽王  
行叅軍

盧文偉字休族范陽人北州冠族少為鄉閭所敬州辟主簿年三十八始舉秀才

盧恭道性溫良有文學州辟主簿李崇北征以為開府墨曹叅軍

李幼廉趙郡人初為濟州長史文襄嗣事召詣晉陽除霸府掾謂杜弼曰并州王者之基須好長史各舉所知時立有所稱皆不允衆人未答文襄乃謂陳元康曰我教君好長史處李幼廉即其人也遂命為并州長史嘗

在文襄第內與隴西辛術等六人號為館客待以上賓之禮

平鑿燕郡人鑿歸爾朱榮於晉陽因陳靖亂安民之策榮大奇之即署叅軍前鋒從平鞏密每陳先登除撫軍襄州刺史

孫寡字彥舉樂安人高祖西討令作檄其文甚美高祖大悅即署相府主簿專典文筆

崔伯謙字士遜少孤貧善養母高祖召赴晉陽補相府

功曹稱之曰清直奉公真良佐也遷瀛州別駕

蘇瓊字珍之幼時隨父在邊嘗謁東荊州刺史曹芝芝戲問之曰卿欲官否對曰設官求人非人求官芝異其對署為府長流叅軍

高隆之字延興身長八尺美鬚髯沉深有志氣魏汝南王悅為司州牧以為戶曹從事遷員外散騎侍郎高祖與行臺于暉出討羊侃於太山暉引隆之為行臺郎中孫騰少質直明解吏事屬爾朱榮建義騰隨榮入雒高

祖之為晉州引騰為長史加後將軍

斛律羨字豐雒少有機警尤善射藝高祖見而稱之世宗擢為開府叅軍

薛元穎太常卿光熾之子廉謹有信義起家永安王叅軍

陸印為吏部郎中上雒王思宗為清郡尹辟為邑中正  
食具邱縣幹

盧潛范陽涿人容貌瓌偉善言談少有成人志上儀同

賀拔勝辟開府行叅軍

劉逖字子長彭城人少而聰敏弋獵騎射以行樂為事  
愛交遊善戲謔郡辟功曹

崔暹字季倫世為北州著姓父穆州主簿暹書生避地  
渤海依高乾以妹妻乾弟慎後臨光州啓暹為長史

宋遊道廣平人魏廣陽王深北伐請為鎧曹及為定州  
刺史又以為府佐

盧斐字子章性殘忍以強斷知名世宗引為刑獄叅軍

李愬孝昌之末天下兵起愬潛居林慮山觀候時變賊帥鮮于脩禮毛普賢作亂詔遣大都督長孫稚討之稚素聞愬名召兼帳內統軍

裴誼之為沛王大司馬府記室遷鄴後誼之留在河南西魏領軍獨孤信入據金墉以誼之為開府屬號曰雒

陽遺彥

又周書云柳蚪退耕陽城大統三年馮翊王元季海領軍獨孤信鎮雒陽時舊京荒廢人物罕

存唯有蚪在陽城誼之在潁川信等乃俱徵之以蚪為行臺郎中誼之為督府屬竝掌文翰時人為之語曰北府裴

誼南省

柳蚪

裴藻少機辯有不羈志太傅司馬子如以為主簿子如之子消難鎮北豫又以為中兵叅軍

後周宇文深初仕後魏秘書郎時群盜蜂起深屢言時事爾朱榮雅知重之拜厲武將軍尋除車騎府主簿後為子都督太祖以深有謀略欲引致左右圖議政事乃啓為丞相府主簿

周惠達字懷文章武人魏齊王蕭寶寅為瀛州刺史召惠達及河間馮景同在閣下甚禮之孝昌初魏臨淮王

或以惠達為府長流叅軍

又云寶寅為大督景同為功曹叅軍

皇甫璠安定人少忠謹有幹略州辟為掾太祖為牧補主簿以勤事被知每蒙褒賞引為丞相府行叅軍

冀雋魏太昌初為賀拔岳墨曹叅軍及岳被害太祖引為記室

薛端字仁直河東人年十七司空高乾邕辟為叅軍賜平陰男

柳帶韋字孝孫深沉有度量少好學身長八尺三寸美

風儀善占對韓賢素為雒州刺史召為主簿

蘓亮字景順魏齊王蕭寶寅引為叅軍後寶寅開府為其府主簿寶寅西征轉記室叅軍寶寅遷大將軍仍為之掾寶寅雅知重之

柳敏河東解縣人為河東郡丞及文帝尅復河東見而器異之乃謂之曰今日甚喜得卿也即拜丞相府叅軍事轉戶曹叅軍兼記室

盧柔字子剛賀拔勝出牧荊州以柔為大行臺郎中掌

書記及勝為大保以柔為掾

趙善字僧慶爾朱天光為肆州刺史辟為主簿深器重之又以為長史軍中謀議每叅預之天光為關右行臺表善為行臺右丞後賀拔岳總關中兵復以為長史韓裒為大中大夫魏室亂裒避地於夏州太祖為丞相引裒為錄事叅軍尋為丞相府屬

趙肅河南人早有操行魏正光中酈元為河南尹辟為主簿

薛寘為中書令車騎大將軍儀同蕪公于謹征江陵以寘為司錄軍中謀略寘竝叅之

李旭頓邱人初謁太祖深竒之綏德公陸通盛遜僚案請以旭為司馬太祖許之後太祖嘗欲以書記委之於是旭為丞相府記室叅軍

檀翥高平人司州牧城陽王元徽以翥為從事尋謝病客遊三輔時毛遜為行臺鎮北雍州表翥為行臺郎中元偉河南人為幽州都督府長史尉遲廻伐蜀以偉為

司錄書檄文記皆偉所為

梁昕安定人為關中著姓後居京兆之整屋魏正光中秦隴亂蕭寶寅為大都督統兵出討以昕為行叅軍以功累進征西將軍爾朱天光入關復引為外兵叅軍太祖迎魏孝武軍次雍州昕以三輔望族上謁太祖見昕容貌瓌偉深賞異之即授右府長流叅軍

辛慶之隴西狄道人為祕書郎司空楊津為北道行臺討爾朱氏啓慶之為行臺左丞與叅謀議後賀拔岳為

行臺復啓慶之為行臺吏部郎中開府掾

樊深字文深河東猗氏人于謹引為府叅軍事累轉從  
事中心郎謹拜司空以深為諮議

杜叔毗字子弼性慷慨有志節晉公護辟為中外府樂  
曹叅軍

令狐整字延保燉煌人世為西土冠族魏東陽王元榮  
辟為主簿

顏之儀父協在梁不仕元帝為湘東王引協為其府記

室叅軍協不得已乃應命

隋柳雄亮字信誠幼有志節好學不倦柱國蔡國公廣  
欽其名行引為記室叅軍年始弱冠府中文筆頗亦委  
之

趙芬字士茂少有辯智頗涉經史太祖引為相府鎧曹  
叅軍歷記室

辛彥之不交非類博涉經史太祖見而器之引為中外  
府禮曹賜以衣馬珠玉

衛玄字文昇少有器識周武帝在藩引為記室

柳彧少好學頗涉經史大冢宰宇文護引為中外府記室

李文博為縣丞數載不調薛道衡為司隸大夫遇之於東都尚書省甚嗟愍之遂奏為從事因謂齊王司馬李綱曰今日遂遇文博得奏用之以為懽笑其見賞知音如此

劉行本自梁歸周以諷讀為事性剛烈大冢宰宇文護

引為中外府記室

元巖少以名節自許與高穎友善周大冢宰宇文護見而器之以為中外府記室

郭榮太原人周大冢宰宇文護引為親信護察榮謹厚擢中外府水曹叅軍

李德林字公輔在齊為殿中將軍天保之季謝病還鄉闔門自守乾明初尚書令楊遵彥奏追德林入議曹長廣王作相居守在鄴引授丞相府行叅軍

趙賢通沉深有器局周太祖引為相府叅軍事

王邵字君懋少沉嘿好讀書弱冠齊尚書僕射魏收辟  
開府軍事

庾季才幼穎悟好占玄象梁廬陵王續辟荊州主簿湘  
東王繹重其術藝引授外兵叅軍

蕭寶美風儀善談笑年未弱冠名重一時高祖輔政引  
為丞相府典籤深被識遇

諸葛穎清辯有俊才晉王廣素聞其名引為叅軍事

韋師字公穎京兆人周大冢宰宇文護引為中外府記室轉賓曹叅軍齊王憲為雍州牧引為主簿

韋世康京兆人幼而沉敏有器度年十歲州辟主簿段文振性剛直明達時務為後周宇文護親信知其有幹用擢授中外府兵曹

韋壽字世齡孝寬之子在周以貴公子罕有令譽趙王為雍州牧引為主簿

韋肅在周為宣納上士高祖為相引為賓曹叅軍

長孫熾字仲光在州為御正上士高祖作相擢為丞相  
府功曹叅軍

盧愷字長仁神情爽悟沿涉書記頗解屬文周齊王憲  
引為記室

盧昌衡字子均年十七魏濟陰王元暉召補太尉叅軍  
事兼外兵叅軍

魏澹字彥深世以文學自業齊博陵王濟聞其名引為  
記室及琅邪王儼為京畿大都督以澹為鎧曹叅軍

陸真字開明少而聰敏年十七齊司州牧清河王岳引  
為主簿

趙綽周初為夏官下士以明幹見知後為掌教中士高  
祖為丞相知其清正引為錄事叅軍

鮑宏字潤身嘗和梁湘東王繹詩嗟賞不已引為中記  
室

裴政字德表年十五辟梁邵陵王府法曹叅軍事累轉  
枝江令湘東王之臨荊州召為宣惠府記室

柳莊字思敬少有遠量博覽墳籍兼善辭令梁岳陽王蕭譽辟為叅軍轉法曹

郎茂字蔚之為陳州戶曹屬高祖亳州總管見而悅之命掌書記

高構字孝基北海人好讀書工史事弱冠州補主簿仕齊河南王叅軍事

張處威字元敬年十二州補主簿十八為太尉中兵叅軍齊亡仕周為宣納中士高祖得政引為相府典籤

裴矩字弘大河東人齊北平王貞為司州牧辟為典曹  
從事轉高平王文學及齊王不得調高祖為定州總管  
召補記室甚親敬之以母憂去職高祖作相遣使者馳  
召叅相府記室事

何稠字桂林仕周御飭下士及高祖為丞相召補叅軍  
兼掌細作署

皇甫誕字玄憲安定人少剛毅有器局周畢王賢通引  
為倉曹叅軍

游元字楚客廣平人少聰敏年十六齊司徒徐顯秀引為叅軍事開皇中為殿內侍御史晉王廣為揚州總管以元為法曹叅軍

張祥京兆人少為高祖所知其後引為丞相叅軍事陸彥師字雲房好學解屬文魏襄城王元旭引為叅軍事齊彭城王浹為司州牧召補主簿後歷中外府東閣祭酒

趙軌河南人少有行簡周蔡王引為記室以清苦聞

劉綽字士元都昌人以儒學知名為州博士刺史趙賢  
通引為從事

劉炫字光伯河間人周武帝平齊瀛州刺史宇文弋引  
為戶曹從事後刺史李繪署禮曹從事以吏幹知名

劉臻字宣摯沛國人仕梁為召陵王東閣祭酒後仕蕭  
答為中書侍郎周冢宰宇文護辟中外府記室叅軍事  
羽檄多成其手

孫萬壽字仙期信都人滕穆王引為文學坐衣冠不整

配防江南行軍總管宇文述召典軍書

唐儉字茂約并州人高祖在太原留守儉與太宗周密高祖開大將軍府授簡記室叅軍

劉政會滑州人隋大業中為太原鷹揚府司馬高祖大將軍府建引為戶曹叅軍從平長安除丞相府掾

武士彟并州人高祖初行軍於汾晉休止其家因蒙顧接及為太原留守引為行軍司鎧以士彟為大將軍府鎧曹姜暮秦州人大業末為晉陽長高祖留守太原見暮深

器之大將軍府建引為功曹叅軍平京城除相國賓曹  
叅軍

温大雅字彥弘高祖在太原甚禮之義兵起引為大將  
軍府記室叅軍專掌文翰

竇威字文蔚隋蜀王秀辟為記室以秀行事多不法稱  
疾還田里累轉考功郎中坐事免高祖入關召補大丞  
相府司錄叅軍

李綱字文紀少慷慨有志節每以忠義自命周齊王憲

引為叅軍

封倫字德彛隋開皇末江南作亂內史楊素往征之署  
為行軍記室

房喬字玄齡齊人太宗徇渭北一見便如舊識署為北  
道行軍記室叅軍

杜如晦字克明仕隋補滄陽尉尋棄官而歸太宗平京  
城引為秦王府兵曹叅軍

張公謹字弘懷倜儻好竒略檢校郢州別駕初未知名

太宗為秦王李勣驟薦之於是引入幕府

岑文本字景仁南陽人蕭銑僭號召署中書侍郎及河  
間王孝恭定荊州署荊州別駕孝恭進擊輔公祐召典  
軍書復署行臺考功郎中

令狐德棻宜州人義旗建淮安王神通據太平宮自稱  
總管以德棻為記室叅軍高祖入關引直大丞相府記  
室

于志寧為銀青光祿大夫太宗為秦王天策上將志寧

累授天策府從事郎中

李守素有實學高才為山東名族容儀魁偉性識通辯  
工談論言詞簡要文洞名理太宗平王世克徵為學士  
署天策府倉曹

李桐客仕隋為門下錄事從討竇建德建德平太宗授  
秦府法曹叅軍

蔡允恭初仕隋為起居舍人太宗平山東召入幕府署  
叅軍事補學士

蘇味道為咸陽尉吏部侍郎裴行儉甚加禮遇及征突厥阿史那都之引為管記

徐堅為太子文學聖歷中車駕在三陽宮御史大夫楊再思太子左庶子王方慶為東都留守引堅為判官

牛仙客涇州鶉觚人初為縣吏縣令傅文靜甚重之文靜後為隴右營田使引仙客叅預其事遂以軍功累轉洮州司馬開元初王君奭為河西節度使以仙客為判官甚委信之

封常清為四鎮都知兵馬使高仙芝僉人以破達奚功  
授疊州戍主便以為判官仙芝代夫蒙靈答為安  
西節度使便奏為慶王府錄事叅軍克節度判官每出  
征討常令知留後事

崔圓累官司勳員外郎宰臣楊國忠遥制劔南節度使  
引圓佐理乃奏授尚書郎兼蜀郡大都督府左司馬知  
節度留後

段秀實隴州人沉厚多斷天寶初安西節度馬靈答署

為別駕奏從討護密有功授安西府別將七載高仙芝  
代靈營舉兵圍怛羅斯黑衣救至靈營大斃軍士相失  
夜中聞都將李嗣業之聲因大呼責曰軍大而求免非  
夫也嗣業甚慙遂與秀實糾合散卒復成其軍師還嗣  
業請于仙芝以秀實為判官授大侯府果毅後又為節  
度荔非元禮白孝德判官孝德改鎮邠寧奏秀實試大  
常卿支度營田二副使

苗晉卿深沉有精識為中書舍人時宰臣李林甫兼河

南節度使以晉卿為判官處事精審林甫重之

裴冕為渭南縣尉以吏道聞御史中丞王鉷克京畿採訪使表為判官遷監察御史鉷有罪誅河西節度使哥舒翰表冕為行軍司馬

呂諲為寧陵尉本道採訪使韋陟以為支使及哥舒翰為隴右河西節度使奏授左龍武軍倉曹克支度判官歷太子通事舍人性謹密勤於職務在使幕縱無事塊然獨坐不離案牘翰益親之

徐浩字季海累遷右拾遺麗正殿校理幽州節度使張  
守珪奏在幕府改監察御史

令狐湏彰父也天寶中仕鄧州錄事叅軍以清白聞本  
道採訪使宋鼎引為判官

高適好學以詩知名為汴州封邱尉時邊將用事務收  
俊又河西節度使哥舒翰表適為左驍衛兵曹克掌書  
記

趙驂為河東縣丞採訪使韋陟以驂履操清直頗推敬

之表為賓僚使罷陳留採訪使郭納復奏驛為支使

韋倫為藍田尉以吏事勤恪楊國忠署為鑄錢內作使

判官

馬炫以儒學著名隱蘇門山李光弼鎮太原辟為掌書記累遷侍御史嘗叅軍府謀議光弼益器之

韓滉字太冲少貞介好學至德初青齊節度鄧景山辟為判官授監察御史兼北海郡司馬以道路阻絕不獲赴因辟地山南採訪使李承昭奏克判官授通州長史

彭王府諮議叅軍

杜亞京兆人善言物理及歷代成敗之事至德初獻封章授校書郎杜鴻漸為河南節度辟為從事永泰末劔南叛亂鴻漸以宰相出領山南副元帥以亞及楊炎竝為判官

陸長源少涉獵書記乾元中陷河北諸賊因為昭義軍節度薛嵩從事累授檢校郎中

張鎰蘇州人朔方節度齊邱之子以門蔭授左衛兵曹

叅軍郭子儀為關內副元帥以嘗伏事齊邱辟鎰為判  
官後為殿中侍御史坐事貶撫州司戶量移晉陸令未  
之官洪吉觀察張鎬辟為判官奏授殿中侍御史

元載為監察御史韋錡克使監遜黔中引載為判官  
崔元翰年已五十餘李勉鎮滑臺辟為從事後馬燧在太  
原聞其名致禮之又為燧府掌書記

裴胄為秘書郎陳少遊為陳鄭節度使留後奏授大理  
司直少遊罷隴右節度李抱玉奏授監察御史不得意

歸免陳少遊為宣歙觀察復辟在幕府抱玉發怒奏貶  
桐廬尉江西觀察使李栖筠有重望虛心下士幕府盛  
選才彥觀察判官許鳴謙有學識栖筠嘗異席咨事之  
崔造輩皆所薦引一見胄深重之薦於栖筠奏授大理  
評事觀察支使

馬燧字洵美寶應中澤潞李抱玉署奏趙城尉令說相  
衛薛嵩拒絕僕固懷恩署奏左武衛兵曹歷太子通事  
舍人遷著作郎營田判官

齊抗少遊會稽剡溪中好讀書為文長於牋奏壽州刺史張鎰辟為判官閑史事而敏於機鎰甚重之鎰為江南西道都團練觀察使抗隨在幕府建中三年鎰自中書侍郎平章事出為鳳翔隴西節度使奏抗為監察御史前後籌量幕中事多出抗

張建封兗州人大歷初道州刺史裴蚪薦建封於觀察使韋之晉辟為叅謀奏授左清道兵曹不樂吏役而去素與馬燧有故燧為河陽三城鎮過使辟為判官及燧

為河東節度復奏建封為判官特拜侍御史

裴延齡乾元末為汜水縣尉遇東都陷賊因寓居鄂州  
後華州刺史董晉辟為防禦判官

姚南仲自右補闕貶海鹽令浙江東西觀察使韓滉辟  
為推官無何表殿中侍御史內供奉克支使

齊暎少舉進士以博學宏詞授河南府叅軍滑毫節度  
令狐彰辟為掌書記及彰卒後兵亂暎脫身歸東都河  
陽三城使馬燧辟為判官奏殿中侍御史張鎰出為鳳

翔節度使署奏為判官

杜佑字君卿京兆萬年人父希望西河郡太守佑以蔭  
入仕補濟南郡叅軍剡縣丞時潤州刺史韋元甫嘗受  
恩於希望佑謁見元甫元甫未之知以故人子待之他  
日元甫視事有疑獄不能決佑時在旁元甫試訊於佑  
佑口對響應皆得其要元甫竒之乃奏為司法叅軍及  
為浙西觀察淮南節度皆辟為從事深信委之

盧羣字載初少好讀書初學於垂山淮南節度陳少遊

聞其名辟為從事建中末薦於朝廷會李希烈反叛詔諸將討之以群為監察御史江西行營糧料使興元元年江西節度嗣曹王臯奏為判官曹王移鎮江陵襄陽皆佐使幕府中事多以咨委以正直聞

嚴礪為梓州玄武尉從祖兄震節制南梁委以廩餉之職事甚修辨署為從事加兼監察御史

路泌為城門郎從幸梁州以策說渾瑊署為從事瑊討李懷光累奏為副元帥判官

李景略幽州人為幽府功曹寓居河中李懷光為朔方節度招在幕府懷光反狀始萌景略退歸私家尋為靈武節度杜希全辟在幕府轉殿中侍御史

高郢字公楚授咸陽尉郭子儀辟為掌書記後忤子儀旨奏貶猗氏丞李懷光節制邠寧奏為從事轉副元帥判官及懷光叛馬燧平河中又辟郢為掌書記

權德輿字載之韓洄黜陟河南辟為從事試秘書省校書郎貞元初復為江西觀察使李兼判官府罷杜佑裴

胄皆奏請表同日至德宗雅聞其名徵為太常博士  
李若初為陳州太康令刺史李克厚遇之克遷河陽三  
城使奏若初為從事軍中事多委之

李融少孤自修立性嚴正善吏事累官至美原尉京兆  
尹賈至舉授長安主簿朔方節度郭子儀署奏監察御  
史為賓佐居無何子儀聽讒署奏大理司直兼襄陵令  
官罷鮑防署奏監察御史福建都團練判官

馬彞扶風人嗣曹王臯為襄陽節度善用人事彞未知名

臯始辟之卒以正直強幹稱

冊府元龜卷七百二十八

欽定四庫全書

冊府元龜卷七百二十九 宋 王欽若等 撰

幕府部

辟署第四

唐于頔字休甫河南人少以吏事聞累授京兆府士曹  
為尹史翽所知翽出鎮襄陽奏為御史充判官大歷中  
第五琦署為河東租庸糧料鹽鐵等使務元載為諸道  
營田使又署為郎官令於東都汝州開置屯田

于頔字允元河南人始以千牛備身調華陰尉黜陟使  
劉灣辟為判官

李元諒勇敢多計少從軍備禁衛積功勞至試太子詹  
事鎮國軍節度使李懷讓署奏鎮國軍副使使領州

盧綸建中初為昭應令朱泚之亂戍寧王渾瑊克京城  
西面副元帥板綸為元帥判官檢校金部郎中

呂元膺鄆州東平人質度瓌偉有公侯之器建中初策  
賢良對問高第授陝州安邑尉同州刺史侯鑄聞其名

辟為長春宮判官屬蒲賊侵軼橋失所守元膺遂潛跡  
不務進取貞元初論惟明節制渭北延在賓席自是名  
達於朝廷

鄭雲達滎陽人大歷初舉進士性果誕敢言客遊兩河  
以畫干朱泚泚悅表為判官授大理評事累諫議大夫  
奉天之難奔赴行在居數月李晟表為行軍司馬戎略  
多咨之賊平拜給事中

趙植奉天人朱泚之亂德宗幸奉天以家人奴客奮力

拒守仍獻家財以助軍資賊平咸寧王渾瑊辟為推官  
貞元初遷鄭州刺史鄭滑節度使李融奏兼副使

郝士美字和夫未冠為陽翟丞李抱真鎮潞州辟為從  
事雅有叅贊之績

李鄴字建侯為李懷光所辟懷光叛鄴密奏賊軍虛實  
及攻取之勢事泄懷光囚之獄中懷光死馬燧就獄致  
禮表為河東從事尋以言不行歸養雒中襄州節度嗣  
曹王臯致禮延辟署為從事

崔從貞元初進士登第釋褐山南西道推官以父憂免喪不應辟命久之西川節度韋臯奏掌西山運務知邛州事劉闢阻命從拒守不從之闢平從事坐累多伏法唯從以拒闢免盧坦在宣州辟為團練副使

胡証字啓中河東人舉進士貞元中登科渾瑊為河中節度使辟為從事自殿中侍御史拜韶州刺史以母年高不可適遠改授太子舍人襄陽節度使于頔請為掌書記程昇為華州鄭縣尉精於吏職剖析無滯杜雍之刺同

州帥河中辟為賓佐

韋綬字子章初為長安尉朱泚之亂變服乘驢赴奉天于頓鎮襄陽辟為賓佐

段平仲舉進士杜佑李復相繼鎮淮南皆表為掌書記復移鎮華州仍為從事

劉伯芻登進士第志行脩謹淮南杜佑辟為從事

穆員工文詞尚節義杜亞為東都留守辟為從事檢校員外郎

路隨泌子也為潤州叅軍為李錡所困使知市事隨儵然坐市中不介意韋夏卿為東都留守聞而辟之由是聲名自振

孟郊少隱於嵩山稱處士李翱分司雒中與之遊薦於留守鄭餘慶辟為賓佐餘慶鎮興元又奏為從事辟書下而卒

竇羣為侍御史順宗時附王叔文為叔文之黨出為唐州刺史羣至唐州節度使于頔以故人待之署羣為副

使表兼御史中丞賜金紫

竇晫字中行大歷十四年登進士第寓居廣陵之柳楊  
結廬種樹不求苟進以講學著書為事凡二十年不出  
貞元十四年杜佑鎮淮南奏授校書郎為節度叅謀

馬總字會元為刑部侍郎元和十二年宰相裴度為淮  
西宣慰處置使奏總為宣慰副使司勳員外郎李正封  
都官員外郎馮宿禮部員外郎李宗閔等為兩使判官  
書記皆從之

韓愈字退之元和中為右庶子時方討淮蔡兵久無功  
丞相裴度兼淮西節度督軍於郾城奏愈守本官兼御  
史中丞為行軍司馬仍賜金紫旋以蔡州平隨度歸闕  
拜刑部侍郎

崔戎字可大為藍田主簿為藩鎮名公文辟裴度領太  
原署為叅謀

竇鞏字友封元和二年登進士第袁滋鎮滑州辟為從  
事滋改荆襄二鎮皆從之掌書記之任平盧薛平又辟

為副使入朝為刑部郎中元稹觀察浙東奏為副使兼中丞賜金紫移鎮武昌鞏又從之終於鄂渚

孔敏行字至之元和五年進士擢第呂元膺廉問岳鄂辟為賓佐丁母憂而罷後元膺為東都留守移鎮河中敏行皆從之

梁觀梁州城固人夫妻隱於城固南山山南西道節度使鄭餘慶高其行辟為節度叅謀

賈直言初從事於李師道師道不恭朝命直言冒刃說

者二輿觀說者一師道訖不從及劉悟斬師道節制鄭滑得直言於禁錮之間又嘉其所為因奏置幕中悟遷於潞亦與之俱後穆宗以諫議大夫徵之悟拜章乞留復授檢校右庶子兼御史大夫依前充昭義軍行軍司馬

張又新為左補闕與拾遺李續之尤蒙宰相李逢吉睽待指為鷹犬逢吉出為山南東道節度使請又新為行軍司馬續之為副使

薛戎字元夫河中寶鼎人少有學術不求聞達居於毗陵之陽羨山年踰四十不易其操江西觀察使李衡辟為從事使者三返方應召故相齊映代衡又留署職府罷歸之

高瑀少好論兵釋褐右金吾曾曹累辟諸府從事

王質字華卿釋褐嶺南管記歷佐淮蔡許昌梓潼興見四府累奏兼監察御史入朝累官戶部員外郎舊府延薦檢校司封郎中賜紫金魚袋充興元節度副使

崔咸少有林壑之志往往潛遊南山經時不返既冠連  
中文科尤長於篇詠好飲酒每風月孤靜吟嘯移時多  
悽愴流涕至酷醉則已鄭餘慶李夷簡皆辟於幕中如  
奉師友

崔珣博陸人王質為宣州觀察使辟珣及劉蕡裴夷直  
趙哲為從事皆一代名流

羅讓丁父憂喪服既除尚麻衣茹荼不從四方之辟者  
十年李鄴為淮南節度就其家拜請從事除監察御史

李德裕字文饒元和初以父再秉國均避嫌不仕臺省累辟諸府從事張引靖罷相鎮太原辟為掌書記錄大理評事遷殿中侍御史

李石元和十三年進士擢第從涼國公李聽歷四鎮從事後為兵部郎中令狐楚奏為太原節度副使

韋澳字子斐太和六年擢進士第性貞退登第後十年不仕周墀鎮鄭滑辟為從事

劉蕢寶歷二年擢進士第太和二年策試賢良不第令

狐楚在興元牛僧儒在襄陽辟為從事待如師友

鄭亞字子佐李德裕在翰林亞以文干謁深知之出鎮浙西辟為從事

鄭畋字台文亞之子也釋褐汴州節度推官大中朝白敏中令狐絢相繼秉政素與李德裕相惡凡德裕親舊多廢斥之畋不得偕於士伍咸通末令狐絢出鎮淮海劉瞻鎮北門辟為從事

盧簡求字子藏釋褐江西王仲舒從事又從元稹為浙

東江夏二府掌書記裴度鎮襄陽保釐東雒皆辟為賓  
佐入朝為監察御史裴度鎮太原復奏為記室

令狐楚弱冠擢進士第桂州觀察使王拱愛其才辟為  
幕府懼不從請飛章而後致意父承簡時為太原功曹  
楚有庭闈之戀至桂林謝知不預晏遊乞解職奉養李  
說嚴綬鄭儋繼鎮太原高其節行累辟為掌記

鄭朗字有融長慶元年登進士甲科覆落柳公綽鎮襄  
陽首辟之朗後為名相公綽又辟盧簡辭崔璵夏侯孜

韋長李拭皆至公卿

柳璧進士第文格高雅馬植鎮陳許辟為掌書記又從  
植汴州李瓚鎮桂州奏為觀察判官

柳玘初辟高湜度支推官踰年拜左補闕湜出鎮澤潞  
奏為節度副使入為殿中侍御史李尉鎮襄陽辟為掌  
書記湜再鎮澤潞復為副使

李商隱少負奇才令狐楚罷相歷汴州興元節度辟為  
從事遊處之間未嘗相捨楚卒王茂元鎮涇原聞其才

命為管記茂元移任俱之河陽茂元卒桂州鄭亞復奏  
為判官官至侍御史在嶺表累年大中十三年入朝京  
兆尹盧弘正奏署掾曹令典牋奏明年令狐絢作相商  
隱屢啓陳情絢不之省弘正鎮徐州又從為掌書記府  
罷復以文章干絢乃補太學博士會河南尹柳仲郢鎮  
東蜀辟為節度判官

劉三復潤州人李德裕為浙西觀察使三復以所業詣  
郡干謁德裕閱其文倒屣迎之辟為從事德裕三為浙

西三復皆從太和中德裕輔政用為員外郎居無何罷  
相復鎮浙西三復從之汝州刺史劉禹錫以宗人遇之  
深重其才嘗為詩贈三復序曰從弟三復三為浙右從  
事凡十餘年往年主公入相薦用登朝中復從公之京  
口未幾而罷昨以尚書員外郎奉使至潞旋承新命改  
轅而東三從公皆在舊地徵諸故事夔無其比因賦詩  
餞別以志之又從德裕歷滑臺西蜀揚州累遷御史中  
丞

楊收字藏之兄發為潤州從事因家金陵收得第東歸  
路繇淮右故相司徒杜悰鎮揚州延收署節度推官奏  
授校書郎自悰罷相鎮西川復管記室宰相馬植奏為  
渭南尉充集賢校理改監察御史收辭以兄尚從事侯  
府植嘉之收即密達意於西蜀願復為叅佐悰即表為  
節度判官植乃以收弟嚴代為校理周墀罷相鎮西蜀  
表嚴為掌書記墀至鎮而卒悰乃辟嚴為觀察判官兄  
弟同幕為兩使判官時人榮之

劉鄴三復子也三復嘗為李德裕浙西從事大中初德裕貶逐鄴無所依以文章客遊江浙高元裕廉察陝虢署為團練推官

王堯龜子也苦學善屬文以季父作相避嫌不就科試乾符初崔瑾廉察湖南崔涓鎮江陵皆辟為從事

溫庭筠太原人本名岐字飛卿大中初應進士累年不第徐商鎮襄陽往依之署為巡官

李磎字景望大中十三年登進士第歸仁晦鎮大梁穆

仁裕鎮河陽自監察殿中相次奏為從事

王調為長安令鄭從謹罷相為太原尹北都留守河東  
節度兼行營招討制下許自擇叅佐乃奏調為副使兵  
部員外郎史館修撰劉崇龜為節度判官前司勳員外  
郎史館脩撰趙崇為觀察判官前進士劉崇魯充推官  
前左拾遺李渥充掌書記前長安尉崔澤充支使開幕  
之盛冠於一時中朝瞻望者目太原為小朝廷言名人  
之多也

劉宗望登進士科王凝廉問宣歙辟為巡官崔安潛鎮許昌成都宗望昆仲四人皆在安潛幕下

趙光喬為膳部郎中知制誥劉季述廢立之後旅遊江表以避患嶺南劉隱深重之奏為副使

司空圖咸通中登進士第三司王凝於進士中尤奇之凝廉問宣歙為上客召拜殿中侍御史以赴闕遲留責授光祿寺主簿分司東都宰相盧攜罷免以賓客分司嘉其高節攜入朝路繇分陝謂陝帥盧渥曰司空御史

高士也公其厚之渥即日奏為賓佐後為禮部郎中故相王徽鎮澤潞乃表圖為副使徽不赴鎮而止

韋寂字處默釋褐為萬年尉同州夏陽令崔喬知為循吏辟鹽鐵巡官

梁張策為膳部員外郎華帥韓建辟為戎判及建領許州又為掌書記天復中策奉其主書幣來聘太祖見而喜曰張夫子且至矣即奏為掌記兼賜金紫

孫隲滑臺人知書亦微有詞筆唐光啓中魏博從事公

乘億以女妻之因教以牋奏程式時中原多難縫掖之士縮影竄跡不復自顯億既死魏帥以表章牋疏淹積兼月不能發一字或以隲為言即署末職主奏記事累遷職自支使掌記至節度判官

敬翔字子振同州馮翊人唐平陽王暉之後也翔好讀書尤長刀筆應用敏捷乾符中舉進士不第及黃巢陷長安乃東出關時太祖初鎮大梁有觀察使支使王發者翔里人也翔往依焉發以故人遇之然無繇薦達翔

久之計窘乃與人為牋刺往往有警句傳於軍中太祖  
比不知書章檄喜淺近語聞翔所作愛之謂發曰知公  
鄉人有才可與俱來及見應對稱旨即補右職每令從  
軍翔不喜武職求補文吏即署館驛巡官俾專掌檄奏  
龍紀元年六月以朝散大夫前太子中允為中大夫檢  
校水部郎中守揚州大都督府左司馬賜紫金魚袋翔  
始以書檄從軍每進規畫自經始蔡寇至于殄滅梁祖  
嘉其侍從裨贊之績特表其事遂有此授

李振仕唐為台州刺史會盜據浙東不克之任以策干  
太祖太祖竒之辟為從事太祖兼領鄆州署天平軍節  
度副使

韋震仕唐為右武衛將軍歸于太祖表為揚州左司馬  
又表為蔡州四面都統判官尋奏授檢校左僕射克宣  
武節度副使

謝瞳字子明為亳州團練使太祖征淮南過郡因求侍  
府幕表為宣義節度副使留後

高途字昭遠初為鄜州從事為鹽鐵使秦韜玉所知薦於太祖乃署宣武軍掌記遷汴宋毫觀察判官改平宣義兩府從事

盧曾頗好書有所執守始為齊州防禦使朱瓊從事瓊降與之偕來太祖辟為宣義幕職

李珽字公度為監察御史丁內艱憂闋再徵為御史以疾不起成內鎮荊州辟為掌書記踰時乃就內死襄帥趙凝復奏為掌記入為左補闕太祖為元帥復署為天

下掌記一日大會將佐指珽曰此真書記也

羅隱餘杭人也唐廣明中因亂歸鄉里節度使錢鏐辟為從事

後唐任園京兆人李嗣昭典兵於晉陽與園遊處分義甚洽及鎮澤潞請為觀察判官制授廷評解褐賜朱紱

王緘幽州劉仁恭故吏也少以刀筆直記室仁恭假以幕職令使鳳翔還經太原屬仁恭阻命武皇留之緘堅辭復命書詞稍抗武皇怒下獄詰之謝罪聽命乃署為推官歷

掌書記從莊宗經略山東授檢校司空魏博節度副使  
趙光逢幼嗜墳典動守規檢議者目之為玉界尺昭  
宗朝登進士第踰月辟度支巡官鳳翔支使

豆盧革少直亂離避地鄜廷轉入山中王處直禮之辟  
於幕下有秦記之譽因牡丹會賦詩諷處直以葉枯為  
意言甚古雅漸加器仰轉節度判官

趙鳳幽州人從劉守奇奔梁用守奇為博州刺史表  
鳳為判官

何瓚閩人也天祐三年登進士第謁莊宗於晉陽一見受知辟河東推官漸轉留守判官張承業卒代知軍府處事明敏胥吏畏其清而服其能好會賓友飲饌精簡談笑婉洽外疎內密事有所執性復不回鄴中建號拜諫議大夫慮帝業不成堅乞判留守於北京詔下許之未行車駕已平梁苑瓚從至雒下郭崇韜欲留於兩掖為人所忌竟赴北京

盧汝弼唐大順中登進士第宣歙觀察使裴樞辟為判

官後為祠部員外郎知制誥從昭宗遷雒移疾退居客  
遊上黨過潞府為太原所攻節度使丁會歸降汝弼從  
會至太原武皇奏為節度副使累奏戶部侍郎

盧程天復末登進士第為鹽鐵巡官昭宗遷雒陽程客  
遊燕趙中山王處直禮遇未優故投于太原莊宗署為  
推官尋改支使後歷觀察判官

李敬義衛公德裕孫也嘗從事浙東退歸雒南平泉舊  
業昭宗遷都雒陽敬義為司勳員外郎辭疾不授乃為

衛尉寺主簿後挈族客居衛州者累年莊宗定河朔遣使迎至魏州署北京留守判官

孔邈兗州曲阜人乾寧五年登進士第除校書郎崔遠在中書奏萬年尉充集賢校理以親舅獨孤損方在廊廟避嫌不赴職謁羅紹威於鄴下辟為判官

蕭希甫梁時登進士第之鎮州王鎔署叅軍後遁於易州落髮為僧莊宗搜揚賢俊幽州馬紹宏以希甫聞召至魏州辟為推官

李襲吉乾符末為河東節度李都榷鹽判官時喪亂之後衣冠多逃難汾晉間襲吉訪舊至太原武皇署為府掾出宰榆社光啓初武皇遇難上源記室歿馬既歸鎮辟掌奏者多不如旨或有薦襲吉能文召試稱旨即奏為掌書記三遷節度副使

陳人少好學善屬文嘗客於浮陽會浮陽軍亂徙居大梁莊宗平梁郭崇韜遙領常山召居賓榻崇韜從魏王繼文伐蜀署為招討判官

藥縱之太原人少為儒明宗刺代州署為軍事衙推從  
明宗鎮邢州為掌書記歷天平宣武兩鎮節度副使  
馬郁幽州人劉仁恭入燕用為掌書記唐天祐元年汴  
人寇滄景仁恭求援於武皇武皇徵其兵同攻潞州仁  
恭遣郁與監軍張居翰率師數萬赴會澤潞既平仁恭  
為其子守光所囚兄守文又失滄景乃留郁不遣署為  
副留守累官至檢校司空秘書監武皇與莊宗禮遇俱  
厚歲時給賜優異

司空頊貝州清陽人景福中舉進士不第羅紹威為節度副大使頊以所業干之幕客公乘億為延譽羅弘信署為府叅軍辟館驛巡官改節度巡官歷掌書記

張憲字允中晉陽人精力遊學莊宗嗣世補太原府司錄叅軍天祐十三年授監察賜緋署魏博推官改掌書記魏博觀察判官鎮州平授魏博鎮冀十郡觀察判官胡裝禮部尚書曾之孫莊宗署館驛巡官未幾遷節度巡官賜緋尋歷推官

王正言鄆州人早孤貧為沙門密州刺史賀德倫令歸  
俗署郡職德倫鎮青州表為推官改鎮青州觀察判官  
周玄豹本燕人有素許之術莊宗署玄豹北京巡官  
石知訥本梁時之走吏也漸厠簪組夏魯奇辟為河陽節  
度判官移任許州亦佐之

晉趙瑩初依梁將康延孝延孝奔唐莊宗同光初用為  
鄭州防禦使表瑩為判官三年延孝為陝帥又署賓職  
高祖為陝府兩使留後瑩時在郡以前官謁之一見如

舊相識即奏署官高祖歷諸鎮皆從之

劉昫涿州人文學優贍隱居上谷太寧山與呂夢奇張麟結菴共處定州連帥王處直以其子都為易州刺史署昫為軍事衙推及都去任假五迴令都招昫至中山會其兄暄為節度衙推不踰歲命為觀察推官

馮玉字璟臣少應進士不第唐長興中宣徽使馮贇出鎮太原玉以宗盟之分往依之贇乃奏玉為從事府罷入朝拜監察御史

崔稅梁永明三年舉進士主文薛廷珪愛其才擢升甲  
科開封尹王瓚表為從事專掌書奏瓚待之若親友

呂琦幽州人勵志勤學遊於汾晉唐天祐中莊宗方開  
霸府翹佇賢士墨制授琦代州軍事判官秩滿歸太原  
監軍使張承業重琦器業禮遇尤厚會其子瓘領麟州  
刺史乃辟琦從事同光中趙德均鎮滄州表琦為節度  
推官德均移鎮幽州亦從之

殷鵬字大舉大名人少而雋秀為鄉曲所稱弱冠擢進

士第唐閔帝之鎮魏州聞其名辟為從事

曹國珍字彥輔少值燕薊亂離因落髮被緇客于河西  
延州高萬興兄弟皆好文辟為從事國珍嘗以文章自  
許求貢禮闈萬興飛表薦之梁永明中特勅進士及第  
還為萬興幕客且掌書奏暮年入為左拾遺

史圭常山人後唐同光中任園為真定尹擢本府司錄不應  
命郭崇韜領其地辟為從事及明宗代崇韜復以舊職縻之  
尹玉羽京兆長安人杜門隱居無名宦之意梁永明中

劉鄩開幕鄜坊辟為保大軍節度推官歷雍汴滑兗從  
事

孔宗弼登進士第為弘文校理昭宗幸雒陽河南尹張  
宗奭以宗弼名家子署為幕賓

陳保極閩中人也少好學善屬文後唐天成中擢進士  
第泰王榮後聞其名辟為從事

漢李崧深州饒陽人仕後唐為太常寺協律郎王師伐  
蜀王繼岌為都統署都統掌書記

蘇逢吉京兆人也父悅為高祖從事因從容薦逢吉令  
事左右高祖召見以神情與惠甚憐之有頃擢為賓佐  
為節度判官

李鱗少舉進士累舉不第客遊河朔入常山趙王鎔辟  
為從事常山平莊宗以鱗為霸府支使

龍敏幽州人少為儒丐遊都邑莊宗定魏博敏聞故人  
馮道為霸府記室乃客于河中歲內歸太原館於馮道  
之家監軍使張承業從容謂道曰吾子鄉友南來何不

相見遂得通刺會莊宗在魏州召道從軍承業即署敏  
為巡官典監軍奏記

張允鎮州人幼學為儒任本州為叅軍張文禮之據州  
叛唐莊宗致討允隨文禮于處瑾請降於鄴不允與處  
瑾竝繫于獄鎮冀平宥之留于鄴署府功曹趙在禮嬰  
城叛署節度推官從事滄充二鎮書記

周馮道瀛州人唐天祐中劉守光署為幽府掾守光敗  
遁歸太原監軍使張承業辟為本院巡官尋為霸府從

事莊宗歸寧太原置酒公宴舉酒謂張承業曰予今於此會取一書記先以卮酒辟之即舉酒屬道道以所舉非次抗酒辭莊宗曰勿謙抑無踰於卿也遂署太原掌書記

馬胤孫同光末擢進士第唐末帝為潞王鎮河中胤孫客遊依之署為支使俄改記室潞王守河中留京師歲餘胤孫不離于邸第長興中潞王自西京留守改節鳳翔胤孫累轉觀察判官

和凝字成績十九登進士第滑師賀環知其名辟真幕  
下

蘇禹珪字玄錫以五經中第為潞并管記漢高祖作鎮  
并門奏為廉判

楊凝式為禮部員外郎三川守張宗奭見而嘉之請以  
本官充留守巡官

王仁裕天水人入蜀為翰林學士蜀亡入雒復為秦州  
戎判秩滿歸田里時王思同鎮興元聞仁裕名奏辟為

幕賓尋改西京留守判官

司徒詡清河人少好讀書弱冠應鄉舉不第唐明宗鎮邢臺詡往謁之甚見禮遇命試吏歷須城令有能名長興初唐末帝鎮河中奏辟為從事

賈緯真定人舉進士不第歸河朔本府累署叅軍邑宰范延光鎮真定表授趙州軍事判官

劉暉後唐初投高季興於荆南累為荊州攝官既而兄昫明宗朝為學士遣人召歸梁漢顯鎮鄧州辟為從事

入為監察御史歷水部員外郎史館脩撰長興末宰臣  
趙鳳鎮邢臺表為節度判官

張沆徐州人登進士第唐明宗子秦王好文每賓寮大  
集手自出題令面前賦詩少不如意則壞裂抵棄沆初  
通刺屬合座客各為南湖廳記謂沆曰聞生名久矣請  
為此文沆不獲已從之及羣士記成獨取沆所為勒之  
於石繇是署為河南府巡官秦王敗勒歸鄉里晉初桑  
維翰秉政沆以文干進用為著作佐郎集賢校理右拾

遺維翰出鎮奏為記室

張昭趙郡寧晉人後唐同光中依興唐尹張憲憲奏為  
從事及憲移河東留守與之俱行遇莊宗雒陽之變憲  
為部將符彥超所害昭僅以身免

冊府元龜卷七百二十九

欽定四庫全書

冊府元龜卷七百三十

宋 王欽若等撰

幕府部

連累

貪縱

邪謀

譴斥

連累

古者三公將帥竝開幕府必精於聘選以為叅佐故宗  
璧馬之禮盛弓旌之招為之佐助待以師友若乃裨贊  
無狀計畫靡聞使其僭擬致禍驕侈取亡或陰拱以觀

其謀或踴躍以挺其惡以至法當連茹禍及淪胥至於  
禁錮終身孥戮親族豈繇天孽非不幸焉

後漢傅毅為車騎將軍馬防軍司馬毅以文雅顯於朝  
廷防外戚尊重待以師友之禮及馬氏敗免官而歸

班固為大將軍竇憲中護軍與叅議及憲敗固先坐免  
官

崔瑗為度遼將軍鄧遵所辟居無何遵被誅瑗免歸

羊陟辟大尉李固府舉高第拜侍御史會固被誅陟以故

吏禁錮歷年

何休辟太尉陳蕃府與叅政事蕃敗休坐廢錮

魏王基為大將軍曹爽官屬除河南尹未拜而爽伏誅  
基隨例罷

盧欽為大將軍曹爽掾除尚書郎爽誅免官

裴秀為大將軍曹爽掾遷黃門侍郎及爽誅以故吏免  
蜀向朗領丞相諸葛亮長史隨亮漢中朗素與馬謖善  
謖逃亡朗知情不舉亮恨之免官還成都

晉潘岳為太傅楊駿主簿駿誅除名

嵇含為楚王緯掾緯誅坐免

應詹為趙王倫征東長史倫誅坐免

陸玩徵拜侍中以疾辭王敦請為長史逼以軍期不得已而從命敦平尚書令郗鑒議敦佐吏不能諫正姦惡宜皆免官禁錮會溫嶠上表申理得不坐復拜侍中

宋庾登之為謝晦撫軍長史及晦拒王師欲使登之留守登之不許晦敗登之以無任免罪禁錮還家

陸展為臧質車騎長史尋陽太守質敗伏誅

荀伯玉為晉安王子勛鎮軍行叅軍子勛舉事伯玉友人孫冲為將帥伯玉隸其驅使封新亭侯事敗伯玉還都賣卜自業

陳韋諒為始興王叔陵錄事叅軍兼記室叔陵謀逆諒伏誅

後魏路仲信章武王融之討葛榮也仲信為其都督府長史融敗歿仲信遂亦免棄

李鳳為定州刺史安樂王長樂主簿長樂以罪賜死時  
卜筮者河間邢瓚辭引鳳曰長樂不軌鳳為謀主伏誅  
李遺元為京兆王愉功曹叅軍帶扶邛令為愉所親逼  
與同反愉敗遺元逃竄會赦乃雪

北齊王晞為常山王友時文宣昏逸常山王數諫帝疑  
王假辭於晞欲加大辟王私謂晞曰博士明日當作一  
條事為欲相活亦圖自全宜深體勿怪乃於眾中杖晞  
二十帝尋發怒聞晞得杖以故不殺髡鞭鉗配甲坊居

三年王又固諫爭大被歐撻閉口不食太后極憂之帝謂左右曰儻小兒死柰我老母何於是每問王疾謂曰努力強食當以王晞還汝乃釋晞令往王抱晞曰吾氣息惘然恐不復相見晞流涕曰天道神明豈令殿下遂斃此舍至尊親為人兄尊為人主安可與計殿下不食太后亦不食殿下縱不自惜不惜太后乎言未卒王強坐而飯晞繇是免徙還為王友

後周陸逞為河州刺史晉公護雅重其才表為中外府

司馬頌委任之尋復為司會兼納言遷小司馬及護誅  
坐免官

隋蘇沙羅為益州總管長史會越雋人王奉舉兵作亂  
沙羅從段文振討平之賜奴婢百口會蜀王秀廢吏案  
奏沙羅云王奉為奴所殺秀乃詐稱左右斬之又調屬  
僚令出奴婢沙羅隱而不奏繇是除名

李圓通為并州長史時秦孝王為刺史以奢侈得罪圓  
通亦免官

唐崔器天寶中為監察御史中丞宋渾東畿採訪使渾引器為判官渾坐賊流嶺南器亦隨貶

李白天寶末為永王璘江淮兵馬都督從事璘謀亂兵敗白坐長流夜郎遇赦得還

盧徵永泰中江淮轉運使劉晏辟為從事委以腹心之寄累授殿中侍御史晏得罪徵貶珍州司戶元琇亦晏之門人興元中為戶部侍郎判度支薦徵為度支員外郎琇得罪徵坐貶為信州長史

馬總貞元中姚南仲鎮滑臺辟為從事南仲與監軍使  
不叶監軍誣奏南仲不法及罷免總坐貶泉州別駕監  
軍入掌機務福建觀察使柳冕希旨欲殺總遣從事穆  
贊鞠總贊稱無罪總方免死

沈亞之為桓耆滄德宣慰判官耆帥數百騎入滄州取  
節度使李同捷赴京諸將害耆邀功爭上表論列耆貶  
循州司戶亞之貶虔州南康尉

錢可復太和末為禮部郎中鄭注出鎮鳳翔李訓選名

家子以為賓佐授可復檢校兵部郎中兼御史中丞克鳳翔節度副使訓注敗可復為鳳翔監軍使所害

李巨川為王重榮河中府掌書記重榮為部下所害朝議罪恭佐貶為漢中掾

後唐劉贊明宗朝為刑部侍郎時秦王為元帥秦王府判官太子詹事王居敏與贊鄉曲之舊以秦王盛年自恣須朝中選士納誨莫其凜畏乃薦贊明宗授秘書監兼秦王傅贊性雍和與物無忤居官畏慎人若以私故

干之雖權豪不能移其操及在秦府因事或發正論王側目怒視殊無下賢之色或與諸僚候於外屏有竟日不召而不得食而指闕之謀故不預聞及秦府得罪或傳旨安慰言止於朝降而贊已被麻衣乘驢在門聞其安慰曰此存撫之情也豈有國君之嗣一旦舉室塗地而叅佐朝降免死幸也俄而臺吏示勅長流即時赴貶所

後唐樂文紀為亳州判官刺史李鄴為政貪穢長流崖

州百姓文紀坐昧於贊佐配祁州長流百姓

貪縱

漢陳湯為大將軍王鳳從事中郎湯明法令善因事為  
執納說多從嘗受人金錢作章奏卒以此敗

後漢宋章為司徒桓虞掾章貪而不法同府掾楊仁脩  
不與交言同席

魏丁斐為太祖典軍校尉從征吳斐以家牛羸私易官  
牛

晉郭象辟司徒掾稍至黃門侍郎東海王越引為太傅  
主簿甚見親委遂任職當權熏灼中外繇是表論去之  
諸葛長民為桓玄平西叅軍有文武幹用然不持行簡  
無鄉曲之譽尋以貪刻免

後魏韓務為平北長史頗有受納為御史中尉李平所  
劾付廷尉會赦免

張僧皓為歷城郡功曹時內史房伯祖闇弱委事僧皓  
僧皓大有受納伯祖衣食不充

祖瑩為冀州鎮東府長史以貨事發除名後李崇為都督北討引瑩為長史又坐截沒軍資除名

羊祉為司空輔國長史侵盜公私營構居宅有司按之抵死孝文特恕遠徙復還

元慶智為太尉主簿事無大小得物然後判或十錢或二十錢得便取之府號曰十錢主簿

東魏裴景顏孝靜初徙司空長史在官貪穢武定二年為中尉崔暹所劾事下廷尉遇疾死於獄中

北齊陳元康為神武相府功曹叅軍便辟善事人希顏  
候意多有進舉而不能平心處物溺於財利受納金帛  
不可勝紀放債交易徧於州郡為清論所譏

祖珽為神武開府倉曹叅軍性疎率不能廉慎守道倉  
曹雖云州局乃受山東大文綾并連珠孔雀羅等百餘  
疋令諸嫗擲擲蒲調新曲招城市年少歌舞為娛遊諸  
倡家與陳元康穆子容任胄元士亮等為聲色之遊文  
宣罷州珽例應隨府規為倉局之間致請於陳元康元

康為白繇是還任倉曹珽又委體附叅軍事攝典籤陸子先并為畫計請糧之際令子先宣教出倉粟十車為寮官捉送神武親問之珽自言不署歸罪子先神武信而釋之珽出而言曰此丞相天緣明鑒然實孝徵所為

珽字孝徵

後為秘書丞領舍人事文襄州客至請賣華林

遍略文襄多集書人一日一夜寫畢退其本曰不須也珽以遍略數帙質錢携捕文襄杖之四十又與令史李雙倉督成祖等作晉州啓請粟三千石代功曹叅軍趙

彥深宣神武教給城局叅軍事過典籤高景略疑其不實密以問彥深彥深答都無此事遂被推檢珽即引伏神武大怒決鞭二百配甲坊加鉗其穀倍徵未及科會并州定國寺成神武謂陳元康温子升曰昔作芒山寺碑文時稱妙絕今定國寺碑當使誰作詞也元康因薦珽才學并解鮮卑語乃給筆札就禁所具草二日內成文甚麗神武以其工而且速特恕不問然猶免官散叅軍府文襄嗣事以為功曹叅軍及文襄遇害元康被傷

劄重倩珽作書屬家累事并云祖喜邊有少許物宜早  
索取珽乃不通此書喚祖家私問得金二十五錠唯與  
祖喜二錠餘盡自入又盜元康家書數千卷祖喜懷恨  
遂告元康二弟叔謀季璩等叔謀以語楊愔愔頷眉答  
曰恐不益亡者因此得停文宣作相珽擬補令史十餘  
人皆有受納據法處絞帝尋捨之又盜官遍略一部事  
發文宣付從事中郎王士雅推檢并與平陽公淹令錄珽  
付禁勿令越逸淹遣田曹叅軍孫子寬往珽受命便爾

私逃黃門郎高德正留臺事謀云珽自知有犯驚恐是  
常但宣一命向祕書稱奉并州約束須五經三部仰丞  
親檢校催遣如此則珽意安夜當還宅然後掩取珽果  
如德正所圖遂還宅薄晚就家掩之縛珽送廷尉據犯  
枉法處絞刑文宣以珽伏事先世諷所司命特寬其罰  
遂奏免死除名天保元年復被召從駕依除免例叅於  
晉陽珽尋遷典御又奏造胡桃油復為割藏免官文宣  
每見之常呼為賊

唐陸長源為宣武節度行軍司馬好輕言無威儀自到汴州不為軍州所禮重判官孟叔度性苛刻又縱恣聲色數至樂營與諸婦人嬉戲自稱孟郎繇是人惡而輕之衆心共怒故節度使董晉卒未十日兵亂殺長源叔度仍齋食之

卿侃為壽州刺史楊承恩判官侃擅行威令貪昌貨財多欲枉法貞元十五年七月命權知壽州刺史王宗集衆決疑

後唐馬郁唐末為幽州李儔掌書記嘗使於鎮州王鎔  
官妓有轉轉者美麗善歌舞因宴席郁屢挑之鎔幕客  
張澤亦以文章有名謂郁曰子能坐上成賦可以此妓  
奉酬郁抽筆操紙即時成賦擁妓而去

豆盧革初為定州王處直判官理家無法有日獨請謁  
見處直慮布政有闕疑有所勉歛板出迎革立通尺牘  
處直搢笏披之乃為嬖人祈軍職也

司空頊為莊宗魏博節度判官是時帝方事河南連年

征役魏博軍政決之於頤累遷檢校右僕射權軍府事  
長史補署多通賂遺家畜妓妾不修廉隅同職惡之  
晉張從拙為晉昌府節度行軍司馬以偽蜀故夔王媵  
李氏富於粧奩從拙略娶為妻李氏訴之天福七年四  
月勅以曾該赦宥止配靈武收管永不任用

### 邪謀

夫漢魏之後竝開幕府叅佐之列其猶股肱莫不資濟  
濟之賢成婉婉之畫也若乃以利傷行枉道事人毀信

廢忠交私逢惡縱肆邪說協比匪人故大則毀其龜玉  
小亦累其長上聽其言者曾不是圖觀其謀始之端猶  
謂相得之晚矜其干紀俾之覆宗斯則為人謀而不忠  
當法家之所恥者也是以於奉國為不臣於事人為不  
義前車之覆可以明徵謀謨是資尤所深誠者矣

晉錢鳳為大將軍王敦鎧曹叅軍數得進見知敦有不  
臣之心因進邪說遂相朋構專弄威權言成禍福遭父  
喪外託還葬而密為使與沈充交構沈充為王敦叅軍

明帝將伐敦遣其鄉人沈禎諭克許以為司空克謂禎曰三司具瞻之重豈吾所任幣厚言耳古人所畏且丈夫共事終始當同寧可中道改易人誰容我禎曰不然舍忠與順未有不亡者也大將軍阻兵不朝爵賞自己五尺之童知其異志今此之舉將行篡弑耳豈同於往年乎是以疆場諸將莫不歸赴本朝内外之士咸願致死正以移國易主義不北面以事之也奈何協同逆謀當不義之責朝廷誠信禎所見也賊之黨類猶宥其罪

與之更始况見機而作邪克不納率兵臨發謂其妻子曰男兒不豎豹尾終不還也及敗歸吳興亡失道誤入其故將吳儒家為儒所殺

周撫為王敦從事中郎與鄧嶽俱為敦爪牙甘卓遇害敦以撫為沔北諸軍事南中郎將鎮沔中及敦作逆撫領二千人從之敦敗撫與嶽俱亡走

任讓為冠軍將軍蘇峻叅軍庾亮輔政徵峻為散騎常侍峻疑亮害已表乞補青州界一荒郡以展鷹犬之用

復不許峻嚴裝將赴召猶豫未決讓謂峻曰將軍求處荒郡而不見許事勢如此恐無生路不如勒兵自守峻從之遂不應命

郝超為大司馬桓溫征西將軍枋頭之敗溫深恥之既而超就溫宿中夜謂溫曰明公都有慮不溫曰卿欲有所言邪超曰明公既居重任天下之責將歸於公矣若不能行廢立大事為伊霍之舉者不足鎮壓四海震服宇內豈可不深思哉溫既得此計深納其言遂定廢立

超始謀也

卞範之為桓玄江州刺史委以心膂之任潛謀密計莫不決之後玄將為篡亂以範之為丹陽尹與殷仲文陰撰策命玄僭位其禪詔即範之文也

殷仲文為桓玄諮議叅軍時王謚見禮而不親卞範之被親而少禮而仲文寵遇隆重兼於王卞矣玄將為亂使總領詔命以為侍中領左衛將軍玄九錫仲文之辭也初玄篡位入宮其牀忽陷羣下失色仲文曰將軍聖

德深厚地不能載玄大悅

後秦韋宗為姚宣叅軍姚泓初立宣時鎮李閔北地太守毛雍據趙氏塢以叛于泓泓使姚超擒之宣未知雍敗遣部將姚佛生等來衛長安衆既發宗姦諂好亂說宣曰主上初立威化未著勃勃彊盛為害必深本朝之難未可弭也殿下居維城之任宜深慮之邪望地形險固總三方之要若能據之虛心無禦非但克固維城亦霸王之業也宣乃率戶三萬八千棄李閔以叛

宋何承天為謝晦荊州諮議叅軍領記室文帝元嘉三年晦將見討其弟黃門郎瞻密信報之晦問承天曰若果爾卿令我云何承天曰以王者之重舉天下以攻一州大小既殊順逆又異境外求全上計也其次以腹心領兵戍於義陽將軍率衆於夏口一戰若敗即趨義陽以出北境其次也晦良久曰荆楚用武之國兵力有餘且當決戰走不晚也乃使承天造立表檄

宗儼之為沈攸之荊州主簿攸之既舉兵反初至郢州

有順流之志儼之勸功曹臧寅以為攻守勢異非旬日所拔若不時舉挫銳損威今順流長駢計日可捷既傾根本則郢城豈能自固攸之不從

焦度為江州刺史王景文鎮南叅軍隨景文還都嘗在府州內景文被害度大怒勸景文拒命景文不從

陳彭嵩為始興王叔陵書記領衡陽內史叔陵為逆嵩伏誅嵩叔陵舅也有寵謀謨皆預焉

後魏斛斯椿既歸爾朱榮署外兵事椿性佞巧甚得榮

心軍之密謀頗亦關預

北齊司馬子如魏末為爾朱榮司馬榮之誅子如知有  
變自宮內突出榮宅棄家隨榮妻子與爾朱世隆走出  
京城世隆便欲還北子如曰事貴應機兵不厭詐天下  
洶洶唯強是視於此際會不可以弱示人若必走北即  
恐變故隨起不如分兵守河橋廻軍向京出其不意或  
可離潰假不如心猶足示有餘力使天下觀聽懼我威  
強於是世隆還逼京城

隋張衡為漢王諒侍讀及諒轉牧揚州衡復為掾諒甚親任之衡以竭慮盡誠事之奪宗之計多衡所建

唐高尚玄宗天寶末為安祿山平盧掌書記出入卧內祿山甚信用之祿山肥疾若睡尚執筆在旁通宵不寐繇是益親信遂與嚴莊等共解圖讖因其疑懼勸其謀反祿山累表至屯田員外郎及隨祿山寇陷東京偽授中書侍郎偽敕書制勅盡尚為之毀黷本朝所不忍聞皆繇尚曲說其事也

盧會昌德宗貞元中為昭義節度李抱真營田副使抱  
真卒其子緘匿喪不發會昌令抱真從甥元仲經潛與  
緘謀其明日將吏會集仲經詐為抱真令曰吾疾甚不  
能蒞職今令緘掌軍事諸軍善佐之節度副使李泚及  
諸將吏俛首皆曰諾須臾緘盛服而出衆拜之緘乃悉  
府藏頒賞軍士會昌仍詐為抱真表請以職事付緘翌  
日又令諸將連奏請緘領軍事帝聞抱真卒乃遣中使  
第五守進馳傳觀變且命以軍事屬於大將軍王延貴

守進至潞州絨詐言抱真疾病請見明日如此者凡三日絨乃出造中使左右皆陳兵甚嚴備中使謂絨曰朝廷已知相公薨歿令以軍務屬延貴侍御宜歸發喪行服也絨愕然出謂諸將曰有詔不許絨掌軍事諸公意如何將吏莫有對者絨懼而退遽以使印及管鑰歸監軍是日乃發喪畢一哭中使召延貴以口詔令視事趣遣絨赴東都元仲經逃于外延貴捕得殺之既歸罪仲經會昌因得不坐

卿侃貞元中為壽州刺史楊承恩判官承恩老耄多病其政事委男澄及侃與孔目官林康等承恩既疾甚侃等乃與將校等謀以澄為刺史團練副使王宗知之密與大將田瑀等議曰楊大夫暫疾病當即痊平脫有不諱即朝廷自除刺史豈可便令楊澄知事也遂因繫澄侃等驛騎以聞故授宗官辰侃等得罪

季貞抱昭宗時為幽州李威幕客威以軍亂故推其弟衛為留後鎮州王鎔以威失國因請稅駕於常山北郭

海子園託以親弋既造之威遂逼以兵仗同詣理所乃入自子城東偏門內有鎔之親騎營中之卒忽掩其外關復於缺垣中有一人識是

關文

譴斥

唐殷嶠為吏部侍郎從太宗擊薛舉為元帥府司馬時太宗遇疾委軍於劉文靜誠之曰賊衆遠來利在急戰難與爭鋒且宜持久待糧盡然後可圖也嶠謂文靜曰王體不安慮公不濟故發此言宜可因機破賊乃以勅

敵遺王也久之言於文靜曰王不愈恐賊輕我請耀武以威之遂陳兵塹圻為薛舉所乘軍乃大敗嶠坐滅死除名

元萬頃為李勣遼東道管記勣嘗令萬頃作文檄高麗其語有譏高麗不知守鴨綠水險莫離友報云謹聞命矣遂移兵固守鴨綠官軍不得入萬頃坐是流于嶺外張弘靖為東都留守杜亞從事留守將令狐運逐獸出郊其日有劫運絹於道者亞以運豪家子意其為之乃

令判官穆員及弘靖同鞫其事員與弘靖皆以運職在衙必不為盜劫堅請不按亞不聽遂以獄聞仍斥員及弘靖出幕府有詔令三司使雜治之後果於河南界得賊

後唐盧程莊宗在晉陽程為推官及出師趙魏欲遷為書記程以無刀筆才不敢奉命故盧質典記室留於晉陽自行臺駐魏州河東軍之務專制於監軍張承業承業嘗命程監諸廩出納程辭之曰此事非僕所能請擇

其能者承業叱之曰公稱文士即合飛書草檄開濟霸  
圖命為書記堅稱短拙及令監廩又以為辭公所能者  
何也程垂涕謝之

勾龍階為陝州觀察判官清泰二年勒停追毀見任官  
牒以斷獄謬誤故也

冊府元龜卷七百三十